



Här Fernand Etgen
President vun der Chamber

Lëtzebuerg, de 16. August 2022

Här President,

Esou wéi et am Artikel 80 vum Chambersreglement virgesinn ass, géing ech Iech biede folgend Question parlementaire un den Här Minister fir Educatioun, Kanner a Jugend weiderzeleden.

Nodeems d'Studentefoire 2020 Pandemie-bedéngt exklusive online ofgehale ginn ass, ass 2021 op eng hybride Forme zeréckgegraff ginn, wou während zwee Deeg d'Unien wéi och d'Studentencercelen en physesche Stand um Campus vun der Uni.lu konnten hunn. Dëst Konzept soll fir d'Studentefoire 2022 bäigehale ginn an deemno sinn, wéi schonn 2021, d'Jugendorganisatioune vum physeschem Deel vun der Studentefoire ausgeschloss a kennen nëmme vum virtuellem Deel profitéiere fir hier Organisatioun ze presentéieren.

An dem Zesammenhang géing ech gär folgend Froen un den Här Minister fir Educatioun, Kanner a Jugend stellen:

- Wëssend, dass d'Studentefoire eng immens wichteg Geleeënheet fir d'Jugendorganisatioune war, fir hier Organisatiounen ze presentéieren, wat waren déi genee Grënn déi den Här Minister dozou beweegt hunn, d'Jugendorganisatioune vum physeschem Deel vun der Studentefoire auszeschléissen?
- Kéint den Här Minister sech virstellen, Jugendorganisatiounen erëm un den nächste Studentefoiren deelhuefen ze loossen?
 - o Wa jo, ënnert wat fir enge Konditiounen?
- Si fir d'Joren 2020 an 2021 statistesch erhuewe ginn, wéi vill Schülerinnen a Schüler un der digitaler Versioun vun der Studentefoire deelgeholl hunn an ass och analyséiert ginn, ob si déi gewënschten Informatiounen kritt hunn?
 - o Wa jo, wéi eng Konklusiounen zitt den Här Minister dorausser?
- Fir d'Joer 2021, wou d'Studentefoire physesch ewéi virtuell stattfonnt huet, wéi eng Forme hat méi Zoulaaf an kann elo scho gesot ginn, wéi eng Forme am beschten de Besoine vun de Schülerinnen a Schüler nokennt?
- Gouft unhand vun enger „Enquête de satisfaction“ ermëttelt, wéi zefridden d'Schüler an d'Exposante mat der hybrider Forme vun der Studentefoire an dem Organisationsstanduert waren?
 - o Wa jo, kann den Här Minister ons schonn éischt Resultater virleeën?
 - o Wann nee, gedenkt den Här Minister eng „Enquête de satisfaction“ fir d'Studentefoire 2022 z'organiséieren?

Här President, ech bieden Iech mäin déifste Respekt unzehuelen.



Martine Hansen

Deputéiert



Äntwert vum Här Minister fir Héichschoul a Fuerschung a Minister fir Educatioun, Kanner a Jugend op d'parlamentaresch Fro n° 6676 vun der honorabeler Deputéierter Martine Hansen iwwer d'Studentefoire

Ech reagéieren op der honorabeler Deputéierter Martine Hansen hir Froe mat dësen Informatiounen iwwert d'Konzept an d'Organisatioun vun der Studentefoire.

Et sief virop drun erënnert, dass d'Studentefoire als Objektiv huet, eemol am Joer all d'Schüler aus den zwou leschte Secondairesklassen (1^{re} an 2^e), mee awer och Elteren an all weider interesséiert Persounen, prezis a méiglechst komplett iwwert d'Méiglechkeete vun engem Héichschulstudium zu Lëtzebuerg oder am Ausland ze informéieren. Dës Informatiounen betreffen nieft de Studien u sech, also de Studierichtungen, de Studiegäng an den Diplomer, och méiglech Finanzbäihëllefen an natierlech och d'Studenteliewe mat all de praktesche Froen, déi sech an dësem Beräich stellen.

D'Studentefoire ass deemno e wichtegt Evenement am Kalenner vun all 1^{re} an 2^e-Schüler, dee wëll studéiere goen, dat komplementar ass zu all den aneren Offeren, déi zesumme geholl den Orientéierungs- an Informatiounsprozess, dee sech vum Secondaire bis zum Ufank vum Studium erstreckt, ausmaachen.

Wéi déi honorabel Deputéiert an hirer parlamentaresch Fro richtig schreift, gouf d'Studentefoire 2020 pandemiebedéngt eng éischte Kéier exklusiv an digitaler Form ofgehalen. Well nom Ausbroch vun der Pandemie eng radikal Ofso vun der Studentefoire keng Optioun war, huet den Héichschulministère, als Organisateur vun der Foire, missen a kierzester Zäit déi schonn ugelafe Preparative fir eng reng physesch Foire astellen an d'Méiglechkeete vun enger reng digitaler Alternativ préiwen an ëmsetzen. Op dëser digitaler Foire, déi am November 2020 ënnert dem Titel „Studentefoire goes digital“ stattfonnt huet, ware méi wéi 180 Exposante mat hire Stänn vertrueden. Dës goufen insgesamt méi wéi 107.000 mol ugeklickt, an déi op de Stänn disponibel digital Brochuren a Videoe goufe méi wéi 29.000 mol ugeklickt. Déi 31 ugebuede Webinairë goufen insgesamt vu 4.000 Leit suivéiert.

Nom Ofschluss vun der Foire goufen d'Cellules d'orientation aus de Lycéeën, déi national Schülerkonferenz an d'Exposanten iwwert de Wee vun engem Online-Questionnaire zu hiren Andréck befrot.

Aus dëser Ëmfro huet sech erginn, dass d'Struktur an de Layout vun der Plattform fir eng Majoritéit vu Leit (Exposanten a Visiteuren) kloer a liicht verständlech waren, d'Visiteuren hu majoritär (85%) uginn, dass si déi Dokumentatioun fonnt hunn, déi se gesicht hunn. No der Form vun enger zukünfteger Foire befrot, huet sech eng Majoritéit vun de Befrote fir eng hybrid Versioun ausgesprach.

Opgrond vun de gemaachten Erfarungen, de Resultater vun den Ëmfroen a well déi sanitär Situatioun 2021 et ënnert dem CovidCheck-Regimm erlaabt huet, gouf fir dat Joer decidéiert, op eng hybrid Form vun der Foire zeréckzegräifen. Deemno konnten déi interesséiert Persounen (Schüler, Elteren, Enseignanten, ...) sech während enger Woch Enn Oktober op enger digitaler Plattform, an och während engem Dag physesch mat Exposanten austauschen. De presentiellen Deel, déi sougenannten „Journée de rencontre“, huet Samschdes, den 30. Oktober 2021, an der Maison du Savoir vun der Uni Lëtzebuerg

um Campus Belval stattfont. Verrieder aus dem Lëtzebuenger Héichschoulberäich, d'Lycéeën, déi BTS-Formatiounen ubidden, genau wéi och de Studentendaachverband ACEL an déi eenzel Studentecerclé stoungen de Schüler Ried an Äntwert.

Am Joer 2021 waren 217 Exposante mat engem Stand op der digitaler Plattform vertraueden. Ronn 4.900 aktiv Visiteure goufe gezielt. De groussen Interessi weist sech och doduercher, dass d'Stänn insgesamt méi wéi 74.000 mol besicht an déi 31 Webinairë vu ronn 3.500 Persoune suivéiert goufen.

Unzemierken ass nach hei, dass 2021 deem no der Experienz vun 2020 oftmoos geäusserte Wonsch no engem méi direkten Austausch tëscht Exposant a Visiteur mat sougenannten „Chats“ och Rechnung gedroe gouf. Op der „Journée de rencontre“ konnten 48 Exposanten ronn 1.000 Visiteuren empfanke.

An der Ëmfro, déi zur Editioun 2021 vun der Studentefoire duerchgefouert gouf, krut d'Offer un Informatiounen ganz positiv Bewäertungen. Positiv bewäert goufen esouwuel déi digital Plattform ewéi och d'„Journée de rencontre“.

Méi nuanciéiert waren d'Meenungen awer, wat déi digital Interaktioun zwësche Visiteur an Exposant ugeet. Déi Mëttelen, déi zur Verfügung stoungen (Text-Chat, Video-Chat), goufe vun de Visiteuren nëmme ganz ageschränkt genotzt, en Ëmstand, deem d'Exposante bedauert hunn. D'„Journée de rencontre“ krut hirersäits vill Zoustëmmung. Déi meescht Visiteuren hu sech dobäi awer fir de Fall, wou déi sanitär Situatioun et géif erlaben, fir eng Foire en présentiel iwwer zwee Deeg ausgeschwat. Gläichzäiteg huet eng Majoritéit vu Befroten erkläert, dass si eng parallel digital Plattform géife pertinent fannen.

Den Héichschoulministère huet probéiert, all dëse Remarken a Suggestiounen bei der Ausaarbechtung vun der Studentefoire 2022 Rechnung ze droen an huet och e reegelméissegem Austausch mat der ACEL iwwer d'Konzept an d'Organisatioun vun der Studentefoire.

Fir dëst Joer gouf fir eng physesche Foire vun zwee Deeg, verbonne mat enger digitaler Plattform, optéiert.

D'Konzept ass dann och par rapport zu den Editiounen vu virun der Pandemie ugepasst ginn. An der Kontinuitéit vum leschte Joer wäert d'Foire 2022 um Campus vun der Uni Belval stattfannen. Engersäits erlaabt dëst, de Schüler aus dem ganze Land, dësen eenzegaartege Site ze entdecken. Mee virun allem wäerten d'Visiteuren sech fir en hallwen Dag e Bild vum Unisalldag kënne maachen an eng éischt Iddi vun hirem zukünftege Studenteliewen kréien. Entsprechend dem primären Zil vun der Foire, iwwer déi verschidde Méiglechkeete vun Héichschoulstudien ze informéieren, gouf sech fir dës Editioun op Participante konzentréiert, déi am Héichschoulberäich aktiv sinn, also op Unien an Héichschoulen op där enger Säit, an op Studentevereenegungen a -cerclen op där anerer Säit.

Trotz dësem Fokus krut de Jugendrot als Daachverband fir vill Jugendorganisatiounen d'Méiglechkeet ugebueden, fir eng Presenz op der Plaz ze garantéieren, woubäi Verrieder vun den eenzelnen Memberorganisatiounen, déi dat wëllen, sech op dësem Stand kéinten ofwiesselen.

Dat neit Konzept ass selbstverständlech evolutiv a wäert, basierend op den zukünftegen Erfarungen, sécherlech nach am Laf vun de Joren ugepasst ginn. Nom Ofschluss vun der Foire 2022 wäert erëm eng quantitativ a qualitativ Analys vum Event, inklusiv vun de Resultater vun den Zefriddenheetsëmfroen, gemaach ginn. Am éischten Trimester 2023 wäert dann op Basis vun dësen Donnéeën decidéiert ginn, ob an a wéi engem Mooss d'Konzept vun 2022 kéint ugepasst ginn. D'Zil ass



LE GOUVERNEMENT
DU GRAND-DUCHÉ DE LUXEMBOURG
Ministère de l'Enseignement supérieur
et de la Recherche

Le Ministre

et, méttelfristeg en nohaltege Modell fir d'Studentefoire ze definéieren, deem allen Ufuerderunge vun enger moderner, effizienter a preziser Informatioun vun eisen zukünftege Studenten entsprécht.

Lëtzebuerg, de 19. September 2022

De Minister fir Héichschoul a Fuerschung

(s.) Claude Meisch